

/ Admodum R^{de} Pater, et frater in Christo charissime. Miratus sum valde isthic in Belgio doctrinam Michaelis Baii renovari, et breve apostolicum per R^{mum} Nuncium, Sixvo V sedente, promulgatum, contemni. Opto R^{tiam} V^{am} aliquid authenticum ad me mittere, quo
5 fidem facere possim vera esse, quae R^{tia} V^a narravit. Id fieret, si vel theses impressas, vel descriptas lectiones aliquas doctorum istorum huc mitteret, in quibus verbis ipsorum haberentur quae R^a V^a retulit eos docere, videlicet nullum esse auxilium sufficiens, sed omne efficax. Item efficax auxilium in physica praemotione et
10 applicatione situm esse. Item efficaci auxilio voluntatem resistere non posse. Item contrariam sententiam erroris vel haeresis censura dignam esse.

Haec si ad me cito mittantur, remedium, Deo volente, istis novitatibus adferetur. Si possemus etiam certiores fieri, quibus
15 auctoribus mendacia tam manifesta spargantur de condemnatione doctrinae Societatis, ac potissimum si ex Urbe Roma ista scribantur, et a quibus, efficerem profecto ut eos mendaciorum suorum vehementer poeniteret. Interim R.V. bono animo sit, ac pro persecutoribus et calumniantibus orare non negligat. Vale, frater charissime,
20 me, meque apud Deum precibus tuis iuva. Romae die Natalis Domini 1606.

Paris, Bibl.nationale, fonds Dupuy, ms.490, fol.92. Minutè autogr.

Copie dans Fonds italiæen 2061.